

आकाशवाणीखबरां

1. राज्यसभा च राष्ट्रगीत वंदे मातरम पर चर्चा अज्ज बी जारी रेही, चर्चा खत्म करांदे होई केंद्री मंत्री जे.पी नड्डा होरें आखेआ जे वंदे मातरम राष्ट्र दी आत्मा ते देश प्रेम दी भावना गी जगाने दा मंत्र ऐ।
2. राज्यसभा च अज्ज चुनां सुधारें पर चर्चा शुरू होई, बक्ख-बक्ख पार्टिणं दे लीडरें इस चर्चा दरान अपने बचार रक्खे।
3. राज्यसभा च अज्ज भारत दे सभनें शा बड्डे ध्यार देआली गी युनेस्को दी अमूर्त संस्कृति विरासत सूचि च शामिल करने दी सराहना कीती गई।
4. भारत ते ब्राजील नै आपूं च रणनीतिक सहयोग बधाने दे कन्नोकन्नी आपसी रक्षा सरबंधें गी होर निगार बनाने दा धेइया पक्का कीता।
5. भारत च पेट्रोल च 20 प्रतिशत इथेनॉल मलाइयै इस्तेमाल करने कन्नै कार्बन उत्सर्जन च 736 लक्ख मीट्रिक टन दी कमी आई ऐ।
6. इंडिगो एयरलाइन्स 3, 4 ते 5 दिसंबर गी अपने ज्हाजें दिणं डोआरिणं दे रद्द होने कारण प्रभावित यात्रिणं गी 10-10 ज्हार रपे दा मुआवजा देग।
7. रेलवे दियां टिकटां बुक कराने लेई बरते जा'रदे 3 करोड़ कोला मते संदिग्ध ते फर्जी यूजर आई डी खाते बंद कीते गे न।

<><><><><><>

Rajya-Sabha Vande Matram

राज्यसभा च राष्ट्रगीत वंदे मातरम दी 150मीं बरेगंड दे सिलसिले च अज्ज बी चर्चा होई। कल मंगलवारें गृह मंत्री अमित शाह हुंदे आसेआ शुरू कराई गेदी इस चर्चा गी खत्म करने होई राज्यसभा च सदन दे नेता ते केंद्री मंत्री जे.पी नड्डा होरें आखेआ कि वंदे मातरम राष्ट्र दी आत्मा जगाने दा मंत्र ऐ ते एहू देश दी संस्कृति कन्नै जुड़ने दा मौका बी दिंदा ऐ। कांग्रेस दे आरोपें पर नड्डा होरें नड्डा होरें आखेआ जे वंदे मातरम पर चर्चा राणं सरकार साबका प्रधानमंत्री जवाहर लाल नेहरू हुंदी छवि खराब नेई करना चाहंदी सगुआं इतिहास दा सेही रिकार्ड ते सच्चाई देश दे सामने जरूर रखना चाहंदी ऐ।

<><><><><><>

RS-Election Reforms

राज्यसभा च चुनां सुधारें पर चर्चा अज्ज शुरू होई। चर्चा दी शुरूआत करांदे होई कांग्रेस दे अजय माकन होरें चिंता प्रगट करदे होई दोष लाया जे चुनां आयोग मतदान केंद्रें थमां सी.सी.टी.वी कैमरें दी फुटेज जारी नेई ऐ करा'रदा। उनें आखेआ कि भारत लोकतंत्र दी जननी ऐ ते निर्वाचन आयोग गी अपनी विश्वसनियता बनाई रखना लोडचदा कीजे एहदे च दना क कमी बी लोकतांत्रिक संस्थाएं गी कमजोर करी सकदे न। चर्चा च हिस्सा लैंदे होई भारती जनता पार्टी दे नेता सुधांशु त्रिवेदी होरें आखेआ जे भातर इक मात्र जींदा लोकतंत्र ऐ। ई.वी.एम गी लेइयै कांग्रेस पार्टी दे दावें पर सोआल पुट्टे होई उनें आखेआ कि राजीव गांधी हुंदी हकुमत दे दरान गै एहू बवस्था शुरू

कीती गई ही। तृणमूल कांग्रेस दी डोला सेन होरें आखेअि कि उंदी पार्टी चुनां सुधारें दे खलाफ नेई ऐ पर ओह लोके दे ना हटाइयै नमियां लिस्टां तयार करने दे खलाफ ऐ। डी.एम.के दे एन.आर इलांगो होरें दोष लाया जे देसै च पुख्ता चुनां बवस्था नेई ऐ ते ई.वी.एम दे कारण सभनें शा मती परेशानी होआ करदी ऐ। उनें आखेआ जे चुनां प्रक्रिया पर बनी दी बेबसाही ते शेंकाएं गी दूर कीता जाना लोड़चदा। आम आदमी पार्टी दे संजय सिंह होरें दोष लाया जे नमें सिरेआ चुनां सूचिएं दी जांच दा इरादा इनेंगी ठीक ते दुरुस्त करना नेई, सगुआं मतदाताएं दे नां हटाना ऐ।

<><><><><><>

R.S UNESCO Deepawali

राज्यसभा च अजज युनेस्को दी अमूर्त संस्कृति विरसे दी लिस्ट च भारत दे रौशनिएं दे ध्यार देआली गी शामिल कीते जाने दी सराहना कीती गई। राज्यसभा दे चेयरमैन सी.पी राधाकृष्णन होरें आखेआ कि एहू मुल्य लेई इक राश्ट्री गौरव दा मौका ऐ। उनें आखेआ जे देआली भारत थमां इस सूचि च दर्ज होई दी 16मीं अमूर्त विरसा ऐ। उनें मेद प्रगट करदे होई आखेआ जे इस उपलब्धि कन्नै लोके गी रौशनिएं ते न्हरे पर लो दी जित्त दे प्रतीक इस ध्यार गी मते मान कन्नै मनाने लेई प्रेरणा थ्योग ते लोक होर मते उत्साह, चाह ते गौरव कन्नै इसी मनांगन। देआली गी नमीं दिल्ली दे लाल किला च आयोजित युनेस्को दी अंतर सरकारी कमेटी दे 20में इजलास दुरान इस महत्वपूर्ण लिस्ट च शामिल कीता गेआ हा।

<><><><><><>

JK-ABP

केंद्री योजना मंत्रालय नै लोकसभा गी जानकारी दित्ती ऐ जे उनें विकास दी ताहंग आहले अपने आकांक्षी ब्लॉक प्रोग्राम दी सूचि च जम्मू-कश्मीर दे 9 ब्लॉके गी शामिल कीता ऐ। आकाशवाणी दे जम्मू संवाददाता दी रिपोर्ट मुजब आकांक्षी ब्लॉक प्रोग्राम दी शुरुआत जनवरी 2023 च कीती गई ही ते एह्दे दायरे हेठ मुल्य भरै दे कुल 513 ब्लॉके गी आहलेआ गेआ हा। जम्मू-कश्मीर दे जेडे 9 ब्लॉके गी हुन इस सूचि च शामिल कीता गेआ उन्दे च किश्तवाड़ दा मढ़वा ब्लॉक, पुंछ दा मनकोट ब्लॉक, राजौरी जिले दा ख्वास ब्लॉक, रामबन जिले दा खारी ब्लॉक, बांडीपुरा दे तुलैल, बारामुला दा सिंहपुरा ब्लॉक, कुलगाम दा मंजगाम ब्लॉक, कुपवाड़ा जिले दा केरन ब्लॉक, पुलवामा दा इच्छेगोजा ब्लॉक ते रियासी जिले दा ठाकरा कोट ब्लॉक शामिल ऐ।

<><><><><><>

India-Brazil

भारत ते ब्राजील नै अज्ज रणनीतिक सहयोग गी बधाने, सांझे परिचालन ढांचे गी निगार बनाने, सिखलाई कैपें ते समुंद्री सुरक्षा तंत्र गी बदाने ते समुंद्री क्षेत्र जागरूकता च तालमेल ते सहयोग गी मजबूत करने दे कन्नोकन्नी आपसी रक्षा सरबंधें पर चर्चा कीती। भारती नौसेना नै आखेआ कि अपनी 4 दिनें दी ब्राजील यात्रा दुरान नौसेना अध्यक्ष एडमिरल दिनेश के. त्रिपाठी होरें ब्राजील दे राश्ट्रपति हुंदे मुख सलाहकार सेल्सो अमोरिन ते रखा मंत्री जोस मुसियो मोन्तेरो हुंदे कन्नै मलाटी कीती जिस दुरान दौनें मुखें अटलांटिक, व्यापक हिंद प्रशांत ते ग्लोबल साउस दे मुखें दी समावेशी भूमिका सने क्षेत्री ते कुल संसारी मुद्दे पर बी चर्चा कीती।

<><><><><><>

Carbon-Emission

केंद्री सड़क ट्रांसपोर्ट मंत्री नितिन गडकरी होरें आखेआ ऐ कि पेट्रोल च 20 प्रतिशत इथेनॉल मलाइयै इस्तेमाल करने कन्नै कार्बन डाईआक्साइड उत्सर्जन च 736 लक्ख मीट्रिक टन दी कमी आई ऐ। अज्ज लोकसभा च इक सोआलै दा परता दिंदे होई गडकरी होरें आखेआ जे इथेनॉल इक ऐसा ईंधन ऐ जेह्दा पर्यावरण गी नुकसान नेई पुजांदा ऐ ते प्रदूषण गी घट्ट करने च बी मददगार साबत होआ ऐ। उनें दस्सेआ जे भारत फिलहाल हर बरै 22

लक्ख करोड़ रपे दा जीवाशम ईंधन बाहरले मुखें थमां हासल करा करदा ऐ ते विकसित भारत बनाने लेई इस चाल्ली दे ईंधन पर भारत गी खर्चा घट्ट करना होगा।

<><><><><><>

Petroleum Min. Energy

पेट्रोलियम ते कुदरती गैस मंत्री हरदीप सिंह पुरी होरें आखेआ ऐ कि उर्जा अर्थ बवस्था दी जीवन रेखा ऐ ते भारत दी उर्जा खपत बड़ी तेजिया कन्नै बधदी जा'रदी ऐ। अज्ज लोकसीं च प्रश्नकाल दरान जिमनी सोआलें दा परता दिंदे होई पुरी होरें आखेआ जे अंतरराष्ट्री उर्जा एजेंसी दे अनुमान मताबक अगले 20एं बरें च दुनिया दी उर्जा खपत दा 35 प्रतिशत हिस्सा भारत थमां औग कीजे भारत एल्लै सभनें शा तेजिया कन्नै बरोस करा करदी अर्थ बवस्था ऐ। मंत्री होरें आखेआ जे जित्थुं तगर उर्जा दिएं कीतें दी गल्ल ऐ, एह एहदे उत्पपादन पर लागत, इंशोरेंस, ढोआई, डीलर दी कमिशन याहिस्से ते रिफाइन करने पर औने आहले खर्चे पर निर्भर करदा ऐ। उनें गलाया जे इस खुश-खरीद दे बदले जेहड़ा पैहा करसानें गी दित्ता जंदा ऐ ओहू बरे परती 40 ज्हार करोड़ रपे ऐ जेहड़ा कृषि अर्थ बवस्था गी उबड़ा चुक्कने च बी मदद करदा ऐ।

<><><><><><>

HFC-Buses

भारी उद्योगें दे केंद्री मंत्रालय नै लोकसभा च बुधवारें जानकारी दित्ती ऐ जे राश्ट्र हाइड्रोजन मिशन दे तैहत्त जम्मू-कश्मीर गी त्रै हाईड्रोजन फ्यूल सेल यानि (एच.एफ.सी) बस्सां सौंपियां न। आकाशवाणी जम्मू संवाददाता दी रिपोर्ट मुजब मंत्रालय दा आखना ऐ जे उनें मुख्य भरै च 100 हाईड्रोजन फ्यूल बसें दी बण्ड दित्ती ऐ जिंदे च 3 जम्मू-कश्मीर आस्तै न ते इस बंड दा मकसद कट उत्सर्जन गतिशीलता गी बढ़ावा देना ते पारम्परिक जीवाशम ईंधन दे इस्तेमाल गी घटना ऐ। एह एच.एफ.सी बस्सां फ्यूल सेल टेकनालजी कन्नै चलदियां न। मंत्रालय दा इब्बी आखना ऐ जे सरकार बक्ख-बक्ख शोध ते विकास पहलकदमिं हेठ हाईड्रोजन फ्यूल सेल टेकनालजी दे इस्तेमाल गी बढ़ावा देआ'रदी ऐ।

<><><><><><>

Justice-Swaminathan

बीजेपी सांसद तेजस्वी सूर्यकांत होरें लोकसभा च मद्रास हाई कोर्ट दे जज न्यामूर्ति जी.आर स्वामीनाथन हुंदे खलाफ महानिभयोग प्रस्ताव आहनने लेई द्रविड़ मुनेत्र कड़गम-डीएम.के सने विरोधी धड़ें दी सख्त चुख्ताचीनी कीती ऐ। उनें इसी महाभियोग दा गलत इस्तेमाल ते देश दी न्याय बवस्था पर हमला करार दित्ता ऐ। लोकसभा च अज्ज सूर्यकांत होरें आखेआ कि एह हिंदू बरोधी भावना गी दर्शाने दे कन्नोकन्नी न्यापालिका दी सुतंत्रता दा बी अपमान ऐ। उनें इस प्रस्ताव गी वापस लैने दी मंग करदे होई आखेआ जे इमरजेंसी दरान कांग्रेस पार्टी नै न्यायपालिका दी सुतंत्रता पर हमला कीता हा। उनें गलाया जे देसै गी डी.एम.के ते कांग्रेस पार्टी दी इस हिंदू बरोधी मानसिकता आहली करतूत पर ध्यान देना लोड़चदा।

<><><><><><>

Smart-Meters

मुखै च कुल 4 करोड़ 93 लक्ख स्मार्ट मीटर लाई दित्ते गेदे न जिंदे चा 1 करोड़ 60 लक्ख स्मार्ट मीटर प्रीपेड बवस्था तैहत्त कम्म करा करदे न। अज्ज लोकसभा च इक सोअलै दे लिखित परते च बिजली मंत्री मनोहर लाल होरें जानकारी दित्ती जे नमें सिरेआ त्यार कीती गेदी बिजली दी बंड सरबन्धी स्कीम दे तैहत्त होर 20 करोड़ स्मार्ट मीटर दी मंजूरी देई दत्ती गई ऐ। उनें दस्सेआ जे इन्दे चा 4 करोड़ स्मार्ट मीटर लाई दित्ते गेदे न। मंत्री होरें आखेआ जे सरकारी दफ्तरें-कारोबारी इदारें ते उद्योगिक ते मते लोड आहले प्रतिष्ठानें च प्रीपेड मीटर लाने दी तरजीह दित्ती जा'रदी ऐ।

<><><><><><>

Indigo-Compensation

इंडिगो एयर लाइन्स नै 3, 4 ते 5 दिसंबर गी एहदे ज्हाजें दियां डोआरियां रद्द होने कारण प्रभावित यात्रिं गी 10-10 ज्हार रपे दा मुआवजा देने दी घोशणा कीती ऐ। इंडिगो नै दस्सेआ ऐ जे एह मुआवजा यात्रा वाउचर दे रूपै च दित्ता जाहग जेहदा इस्तेमाल अगले 12एं म्हीनें दरान इंडिगो दी कुसै बी यात्रा लेई कीता जाई सकदा ऐ। इस ब्हाई कंपनी नै आखेआ ऐ कि सरकारी दिश-निर्देशें दे तैहत्त लाजमी मुआवजे दे अलावा इंडिगो उनें यात्रिं गी

बी 5 कोला 10 जहार रपे तगर दा मुआवजा देग जिंदियां डोआरियां, डोआरी भरने कोला 24एं घंटे कोला बी घट्ट समें पैहले रद्द होइयां हियां।

<><><><><>

DGCA-Indigo CEO

सिविल हवाबाजी महानिदेशालय नै इंडिगो दे मुख् कार्जकारी अधिकारी पीटर एलबर्स गी अज्ज तलब कीता ऐ। एलबर्स गी मुख् च कंपनी दिएं डोआरिएं दे बड्डे पैमाने पर रद्द होने ते चिरें चलने करी पैदा होए दे हालात दे चलदे महानिदेशालय दे सामने पेश होने दा निर्देश दित्ता गेआ ऐ। एहदे शा पैहले सिविल हवाबाजी मंत्री राम मोहन नायडू होरें इंडिगो दे बड्डे प्रबंधन कन्नै स्थिरता सरबन्धी उपाएं बारै समीक्षा कीती ही। मंत्री होरें मुख् भरै च इंडिगो दे ज्हाजें दी आओजाई दी स्थिति दी समीक्षा लेई मंत्रालय दे कंट्रोल रूम दा बी दौरा कीता। इक सोशल मीडिया पोस्ट च नायडू होरें आखेआ जे यात्रिएं दी दिक्कतें गी दूर करने लेई कंट्रोल च तैनात टीमां अनथक जत्त करा'रदियां ना।

<><><><><>

Railway

सरकारै आखेआ ऐ कि रेलवे दियां टिकटां बुक कराने लेई बरते जा'रदे 3 करोड़ कोला मते संदिग्ध फर्जी यूजर आई.डी खातें गी बंद कीता गेआ ऐ। अज्ज लोकसभा च इक सोआलै दे लिखित परते च रेल मंत्री अश्विनी वैष्णव होरें आखेआ कि रेल दी टिकट बुकिंग बवस्था मजबूत ते उन्नत साइबर सुरक्षा नियंत्रण कन्नै लैस इक सुरक्षित सूचना प्रौद्योगिकी मंच ऐ ते एहदे च गड़बड़ी या फर्जीवाड़ा करने आहलें दा तुरत पता लाइयै उन्दे खलाफ कार्रवाई बी कीती जंदी ऐ।

<><><><><>

PM-KUSUM

नमीं ते अक्षय उर्जा दे केंद्री मंत्रालय नै लोकसभा गी दस्सेआ ऐ जे मजूदा माली ब'रे दं नवंबर म्हीने तोड़ी प्रधानमंत्री किसान उर्जा सुरक्षा एवं उत्थान अभियान यानि पी.एम कुसुम योजना दे तैहत जम्मू-कश्मीर च सौर उर्जा कन्नै चलने आहले 3 जहार 601 कृषि पंप स्थापित कीते गे ना। आकाशवाणी दे जम्मू संवाददाता दी रिपोर्ट मुजब मंत्रालय नै आखेआ ऐ जे जम्मू-कश्मीर गी इस योजना दे तैहत 3 जहार सोलर पम्पें दी मंजूरी दित्ती गई ही जिंदे चा 3 जहार 601 पम्प स्थापित करी दित्ते गेदे ना। करसानें दी मदाद लेई सौर उर्जा च आधारित सिंचाई च एह उपलब्धि हासल करने आहले अव्वल दर्जे दे प्रदेशें च जम्मू-कश्मीर नै अपनी टकोहदी पंछान बनाई लैती ऐ।

<><><><><>

LG-Appointment Letters

उपराज्यपाल मनोज सिन्हा होरें जम्मू खित्ते च आतंकवाद हमले च जान मुहाने आहले लोकें दे आश्रितें गी नियुक्ति पत्र सौंपे ना। इस मौके बोलदे होई सिन्हा होरें आखेआ जे आतंकवाद हमलें कन्नै पीड़ित परोआरें कई दाहकें थमां दुखें दा शिकार बने दे हे, उनेंगी कई ब'रें थमां न्याऽ नेई मिले दा हा ते हुन उनें पीड़ित परोआरें गी पंछानेआ जा'रदा ऐ, उंदा सम्मान कीता जा'रदा ऐ। उनें गलाया जे इन्नी बड्डी कीमत चुकाने आहले उनें परोआरें दी इज्जत ते आर्थिक सुरक्षा गी बहाल करना उंदी बचनबद्धता ऐ। उनें आखेआ जे आतंकवाद दे असली पीड़ितें ते सच्चे शहीदें दे आश्रितें गी नौकरी देना स्थाई बचनबद्धता गी दर्शादा ऐ जे मुख् ठोस कार्रवाई कन्नै उन्दे कन्नै खड़ोते दा ऐ। एल.जी होरें आखेआ अलगाववाद दा समर्थन करने आहलें ते मुख् गी खतरे च पाने आहलें गी कनून दे मताबक कार्रवाई दा सामना करना पौगा।

<><><><><>